

Comzraen Youq Lujyen

□ Luz Yuzganh / 陆如刚

Muengh ha! Muengh ha! 11 nyied 1 hauh gyanghaet, gou ndaej daengq bae Baekging camgya aen beizyinbanh youz Luj Sin Vwnzyozyen caeuq Minzczuz Vwnzyoz Caczise gap banh. Seizhaenx, daengx ndang lwed gou goenjfwdfwd hwnjdaeuq, faenh angq-yangz neix lumj gaxgonq gauhgauj gvaq le cieq ndaej mbaw luzcij dunghcihsuh daihhag geiq daeuq nei ha!

Aen coh baez beizyinbanh neix heuhguh “Luj Sin Vwnzyozyen 《Minzczuz Vwnzyoz》 Canghraiz Sawcuengh Canghfanhoiz Beizyinbanh”. Daj aen coh neix couh ndaej rox, gyoengqvunz miz faenh gyahaeuq baez beizyin neix gig mbouj genjdanh lo, gyoengqde cungj dwg doenghboux canghraiz Sawcuengh caeuq Canghfanhoiz Cuengh Gun song saw, caemhcaiq gaenq ndaej gij cingzcik maenhndei cij ndaej iu bae ne. Hainduj gou laihaeuz 40 bous miz faenh bae beizyin cungj dwg vunz Guengjsae raeuz, siengj mbouj daengz ndawde lij miz daegmbauq ndeu dwg daj Yinznanz gvaqdaeuq dem. Couhdwg aenvih caemh ndiepgyaez Sawcuengh cij hawj dou ndaej youq Baekging doxcomz.

Ciuh vunz gou caeuq Luj Sin gig miz yienzfaenh, dauqgeix hwnjdaeuq baeznduj doeg gij faenzcieng de wngdang dwg bien 《Lwgnyezrauh Yinduj》. Hwnj daengz cunghyoz, moix aen haggeiz cungj doeg daengz gij faenzcieng bous vwnzyozyah neix, lumj 《Daj Suenbwzcauj Daengz Ranzsaw Sanhvei》、《Ngonzgeiq Bousgvangz》、《Gogjaeq Ah Q》 doenghgij faenzcieng neix, gig danqfuk gij minzczuz cingsaenz “haeb hangz caengz da coh vunzrwix, gungj hwet ngaemgyaeuq doiq lwgminz”. Daj gou yamq hwnj diuz roen yungh Sawcuengh sij faenzcieng caemhcaiq gya haeuq Guengjsae Cozgyah Hezvei, gou couh haeujsim Luj Sin Vwnzyozyen lo, rox de dwg aen beizyin gihgou cienmonz ciu doenghboux canghraiz、canghvwzzyozbingzlwih、canghvwzzyozlijlun、canghvwzzyozbenhciz caeuq canghfanhoiz daengj lauxhangz neix. Hix rox gwnzbiengz an hawj de gij mingzdaeuq “Vangzbuj Ginhyau Canghraiz”、“Diegcauxgoek Canghraiz”、“Gungdienh Ceiq Sang Vwnzyoz”. Caemhcaiq gou hix rox, 《Minzczuz Vwnzyoz》 dwg bonj cazci guek raeuz gig mizmingz ndeu, geijcib bi gonq mwh gou hwnj daihhag doegsaw couh ciengzseiz bae duzsuhgvanj fan yawj bonj cazci neix, miz haujlai canghraiz、canghvwzzyozbingzlwih siujsoq minzczuz couhdwg youq gwnzde fatbiuj faenzcieng doeklaeng okmingz gwnz biengz!

Couhdwg yienghneix, doenghboux canghraiz caeuq canghfanhoiz byawz cungj maqmuengh ndaej daengz Baekging Lujyen “Diegcauxgoek

Canghraiz” neix hagsib beizyin, ndaej daengz gij vwnzyoz daswh ciuhneix daeuq sonyinx, hawj fouq lwgda bonjfaenh yawj ndaej engq gvangqlangh, hawj lingzganj ndaw uk dou ndaej engq lingzrwd. Ngoenzneix ndaej camgya aen beizyinbanh youz song baih mizmingz gap banh neix, gou roxnyinh miznaj lai lo.

12 nyied 1 hauh lajbyonghngoenz, mwh aen feihgih daj Namzningz mbin daeuq dingz youq Baekging Soujduh Gozci Gihcangz, ndawsim gou mbouj rox geijlai gikdoengh ha! Gaxgonq gou cungj laihaeuz Lujyen liz gou gyae raeuh, siengj mbouj daengz ngoenzneix de fodfwd aj fwnz got gou haeuq ndaw rungj de bae, vuenyungz daeuq ndaej daiq vaiq lo!

Caemh dwg seizdoeng, daxbaenh youq Namzningz lijdwg muenx da cungj heuyauyau, gak yiengh va lij angj hai dwk. Hoeng, Baekging gizneix doenghgo gaenq duet roengz geu “buh saek heu” de, mwngz yawj, baenz baiz baenz baiz gofaexyangz henz roen gaenq bienq ndaej ndoqliuliu, mbouj miz mbawfaex daeuq dangj, ngiengxyaeuq yawj couh raen baenz rongz baenz rongz duzroeg venj youq byaifaex, sikhaek hawj mwngz siengj daengz aen diyzuzgvanj “Rongzroeg”. Yienzhaeuz hoengheiq nit baihaek hawj dou roxnyinh naj gyoet fwnz dot, hoeng, gij ndatcingz dakdaih gyoengqvunz Minzczuz Vwnzyoz Caczise baij daeuq haenx hawj bang vunz dou roxnyinh raeujrubrub: Gyoengqde riengz ci daengz gihcangz cieq dou, cingj gij lauxhangz mizmingz hawj dou hwnjdangz, diegninz gijgwn yienghyiengh bang dou bwh ndei caez.

Youq gwnz hai ban denlij, Cunghgoz Cozhez fucuzsiz Yenz Cinghmingz naeuz: “Bouxcuengh dwg guek raeuz 56 aen minzczuz ndawde gij vunzsoq siujsoq minzczuz cieq lai ndeu, daj ciuhgeq gvaqdaeuq caux ok haujlai vwnzva caeuq yisuz yienhda, gij cangcoz funggek Bouxcuengh vwnzyoz ciuhneix dogdaeg, dwg vwnzyoz saehnieb sevei cuji guek raeuz faenh habbaenz gig youqgaenj ndeu.”

Cunghgoz Cozgyah Cuzbanj Cizdonz Gvanjveijvei fucujyin Bau Genh daengq naeuz: “Doenghboux canghraiz siujsoq minzczuz aeu ndwn youq mbaeksang moq, yungh gij sigai-gvanh dogdaeg sou mbeihung bae siengj、bae naemj、bae sij gij sou soj raen haenx, bae fanjyingj aen biengz sou soj youq haenx.” De lij naeuz canghraiz aeu haeujlaeg swngghoz, caeuq lai yiengh vunz baedauq, aeu gaemdawz diuz saimeg seizdaih.

Guekgya Minzveij Cwngcwz Fazgveihshw bous swhcangj gonq Mauz Gunghningz naeuz: “Guek raeuz youz lai aen minzczuz gap baenz, gak cuz beixnuengx youq Cungguek



Gungcanjdangj dazyinx baihlaj, aeu lumj naed makleizsan nei gaenjmaed dwk got goj hwnjdaeuq, laebmaenh aen minghyinh gungdungzdij Cunghvaz Minzczuz, vih cienzswnj caeuq hwnghat minzczuz vwnzva guh gungyen.”

Youq beizyinbanh ndawde, bang dou gaenlaeng hwnj 《Geij Diemj Naemjngeix Gvendaengz Seizdaih moq Gij Hong Minzczuz Caeuq Minzczuz Vwnzyoz》、《Gij Fazcanj Moq Siujsoq Minzczuz Cungguek》、《Sanjvwz Cuengh Gun Fanhoiz》、《Fwencuengh Cienzswnj Caeuq Fazcanj》、《Guh Bous Canghraiz Sanjvwz Lai Camgya Sevei Hozdung Ndeu》 doenghgij go neix.

Gyoengq lauxhangz hawj dou hwnjdangz, youq dangz go ndawde mbouj gangj vahhoengq, coenzcoenz miz yungh, doiq dou yingyangj gig hung, dou roengzrengz supsou gij cihsiz, amq roengz gietsim doxdaeuq le caemsim sij faenzcieng.

Cawzhai youq gyausiz hwnj dangz, 4 hauh ngoenzde dou lij ndaej ok rog bae guh vwnzyoz sizcen hozdung. Sien bae daengz Soujduh Bozvuzgvanj canhgvanh, hawj dou rox daj ciuhgeq gvaqdaeuq, mboujlwnh baenzlawz gaij ciuh vuenh daih, baihgwnz cungj yawjnaek hong minzczuz, gak cuz beixnuengx hix vih guekgya onjdingh caeuq hwnghat guh ok gungyen hungmbwk. Daengz Houhaij canhgvanh dieg banhgong Minzczuz Vwnzyoz Caczise, hawj dou rox bonj cazci mizmingz neix baenzlawz daj denswj gaujgienth bienqbaenz bonj cazci, caemhcaiq hawj dou rox gij cingzgyang gvendaengz Cungguek Siujsoq Minzczuz Cozgyah Hezvei. Youq Luj Sin Vwnzyozyen gizde, dou gig miz yinxdaeuz yamq haeuq duzsuhgvanj bae fan yawj gij saw yo youq ndaw, dou lij bae canhgvanh Cungguek Yendai Vwnzyozgvanj.

Youq gizde, hawj gou gonqlaeng ndaej yawj guek raeuz gak aen seizgeiz gij cingzgyang gvendaengz vwnzyoz fazcanj, hawj gou rox vwnzyoz caeuq seizdaih lienzhaeh gaenjmaed, vwnzyoz dwg aen gingq ciuq vunz caeuq saeh seizdaih. Youq gizde gou haeujsim ngonzyawj gij rugsaw Luj Sin、rugsaw Lauj Sej、rugsaw Mauz Dun doenghgij rugsaw vwnzyozyah. Byaij gvaq henz rugsaw neix, yamqdin mwngz rox gag menh roengzdaeuz, hix mbouj gamj daih sing gangj vah, lumjnaeuz yaep ndeu couh miz vunz haeujdaeuq, naengh youq naj daiz ngaemgyaeuq sij faenzcieng, mbouj siengj dajduenh gyoengqde.

Hagsib gatsat ngoenzde lajbyonghngoenz, dou lij banh aen codanzei ndeu. Vangz Fungyenj、Fungz Yi、Vangz Beivaz、Fanz Yihbingz、Cinz Yaginh doenghgij yozcej roxnaeuz canghraiz mizmingz caemh daeuq camgya. Gyoengqde maqmuengh caemhcaiq gujli dou laebceiq guh bous canghraiz roxnaeuz canghfanhoiz miz cwzyin ndeu. Gyoengqdou youq gwnz hoih miz maz gangj maz, miz bous gyo'mbaiq Luj Sin Vwnzyozyen caeuq Minzczuz Vwnzyoz Caczise hawj aen gihvei neix daeuq Baekging hagsib, itdingh geiq maenh gij vah lauxsae, haenqrengz sij faenzcieng; miz bous angq dwk eu fwen hwnjdaeuq, gaenlaeng sing rwenz nyex ndaej geij bous yozyenz hix hai bak cuengq sing, eu fwen ciengq go, nauhyied fouzbeij, caezgya angqyangz dangqmaz.

6 ngoenz seizgan yienzhaeuz dinj, hoeng, gij cihsiz baez beizyin neix hag ndaej mbouj suenq noix, roxnyinh de lij beij gimngaenz vanzlij dijbauj ne. Gou nyinhnaeuz, miz gij cihsiz neix daeuq dazyinx, diuz roen sij faenzcieng gou itdingh yied byaij yied gvangqlangh!